

[29] me4 eu
eu4 me carinska unija
ja za evropu evropa za mene



Ministarstvo vanjskih poslova
i evropskih integracija
Cme-Gov



Kontakt: Kancelarija glavnog pregovarača:
tel: +382 (0)20 225-568; +382 (0)20 246-264
e-mail: kgp@mfa.gov.me; web sajt: <http://www.mvpei.gov.me/>

29 CARINSKA UNIJA

Od svog osnivanja 1. jula 1968. godine, Carinska unija predstavlja jedan od kamena temeljaca evropskih integracija i ključnu komponentu dobrog funkcionisanja unutrašnjeg evropskog tržišta. Carinska unija predstavlja jedinstveno carinsko područje 28 zemalja članica Evropske unije u kojem se ukupna unutrašnja trgovina i promet robom između zemalja članica odvija bez carinskih formalnosti, odnosno bez carinskog nadzora nad robom, i bez naplate carinskih davanja. U pogledu trgovinskih odnosa s trećim zemljama, važi princip da sva roba koja ulazi na ovo područje podliježe jedinstvenim pravilima kontrole i naplate propisanih carina. Propisane carine zasnivaju se na zajedničkoj carinskoj tarifi i zajedničkom i usklađenom carinskom zakonodavstvu za primjenu te tarife, što određuje vanjsku politiku prema trećim državama.

Evropska unija utvrđuje visinu svojih uvoznih carina na osnovu međunarodnih sporazuma, uglavnom onih koji su zaključeni u okviru Savjeta za carinsku saradnju i Svjetske trgovinske organizacije. Sa određenim zemljama, kao na primjer članicama Evropskog ekonomskog prostora-Islandom, Norveškom, Lihtenštajnom, Evropska unija ima sklopljene sporazume koji omogućavaju bescarinski pristup određenim proizvodima ili uvoz tih proizvoda po sniženoj cijeni.

Nacionalne carinske službe država članica EU zadužene su za svakodnevno operativno sprovođenje carinske politike Evropske unije. One prikupljaju carinske takse, akcize i porez na dodatu vrijednost na uvezene proizvode iz trećih zemalja, te brinu o poštovanju uvoznih kvota i drugih ograničenja. Carinske takse čine jedan od izvora prihoda budžeta EU, na način da države članice zadržavaju u svom budžetu 25% prihoda od naplate carinskih taksu, a ostalih 75% se uplaćuje u budžet EU.

Države članice sprovode i odgovarajuće carinske kontrole na vanjskim granicama Unije u svrhu suzbijanja svih oblika krijumčarenja, organizovanog kriminala, terorizma, pranja novca, kao i zaštite prava intelektualne svojine, osiguravanja zaštite zdravlja i sigurnosti potrošača i očuvanja životne sredine.

CARINA NA VANJSKIM GRANICAMA EU

U Evropskoj uniji područje carinske unije pravno je uređeno propisima koji su direktno primjenjivi na cjelokupnom području Unije (u svim državama članicama), pa će se ti propisi stupanjem u punopravno članstvo direktno primjenjivati i u Crnoj Gori.

Carinski službenici biće zaduženi da osiguraju primjenu pravila Evropske unije o zaštiti životne sredine i sigurnosti potrošača, na primjer za praćenje kretanja zagađenih namirnica

i njihov povratak u zemlju porijekla. Takođe, pratiće da li određeni proizvodi, na primjer, električni uređaji, zadovoljavaju standard potrebne za plasiranje na unutrašnjem tržištu EU.

Uprava carina je već preduzela značajne i vrlo opsežne aktivnosti na jačanju carinske službe, kao i na razvoju i izgradnji cijelog niza informacionih sistema iz evropskog koncepta "e-carine", koji danom pristupanja Evropskoj uniji moraju biti u potpunosti operativni.

SMANJENJE CIJENA

S danom članstva u Uniji, crnogorski građani će moći kupiti kvalitetnije proizvode iz bilo koje države članice Unije, i to po znatno nižim cijenama nego danas. Carinska unija je jedinstveno trgovinsko područje u kojem sva roba slobodno cirkuliše, bez obzira na to je li proizvedena u Evropskoj uniji ili je uvezena iz trećih zemalja. To znači da, na primjer, električni uređaji proizvedeni u nekoj od zemalja članica EU tako mogu biti isporučeni u Crnu Goru bez obračuna carine i primjene bilo kakve carinske kontrole, dok se, na primjer, carina na proizvod uvezen iz neke zemlje ne-članice Evropske unije, plaća po njegovom prvom ulasku u Evropsku uniju, a nakon toga nema više dodatnih carina ili dodatnih provjera unutar Unije.